

# INUIT ATAQATIGIIT

## Inatsisartuni



UKA 2020/pkt. 118 / 180  
Den 27. Oktober 2020  
Aqqaluaq B. Egede

### Imm. 118

**Utoqqalinersiaqarneq pillugu Inatsisartut inatsisaannik nr. 20, 23. november 2015-meersumik UPA2021- imut allanngartitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni pisortanit utoqqalinersianik pisartagaqarsinnaaneq 66-inik ukioqalernermit pisusanngorlugu allanngartinneqarluni.**

(Partii Naleqqap Inatsisartunut ilaasortaaitai).

### Imm. 180

**Kalaallit Nunaanni utoqqalinermi pensionisiat tunngaviumik aningaasartaata Qallunaat Nunaanni utoqqalinermi pensionisiat tunngaviumik aningaasartaannut Qallunaat Nunaannilu soraarnerussutisiamik aaqqissuussinerup nalimmasarnissaanut Naalakkersuisut UKA2021-mi siunnersuummik saqqummiusseqqullugit peqquneqarnissaat pillugu Inatsisartuni aalajangiiffigisassatut siunnersuut.** (Inatsisartunut Ilaasortaq Aqqa Samuelsen, Inuit Ataqatigiit)

Nunatsinni utoqqalineq toqqissisimanartuussaag, atukkatigut, akissaatigut, ineqarnikkut aamma utoqqartatta paaqqutarineqarnerisigut. Inuit Ataqatigiit isumarput aalajangiusimavarput. Aalajangiusimavarput nunatsinni utoqqartatta atugaat aamma naalakkersuinikkut pitsanngorsarneqarnissaat pisariaqarmat. Nunatsinni aatsaat taamak utoqqartavut atugarissaartigilersimanagerlugit oqaannarnissaq naammanngilaq. Suli pitsanngorsagassaqaqaaq, suliarisariaqarpavut.

Aanaakkut aataakkut, imaluunniit ittukkut ningiukkut inuttut naleqartinneqarnerat naalakkersuinikkut naammattumik uppernarsarneqanngilaq. Naalakkersuisut naalakkersuisooqatigiillu suleqatiseraassi. Ataatsimoorta nunatsinni utoqqaat utoqqalinersiaasa qaffannerisigut utoqqartatta ulluinnarni inuuniarnikkut atugaat oqilisillugit. Inuit Ataqatigiit naalakkersuinikkut sulinitsinni nunatsinni inuit ulluinnarni atugaasa pitsanngorsarnissaat angorusoqaarput. Pisariaqartilluinnarparput utoqqartatta utoqqalinersiaasa qaffanneqarnissaat pillugit Siumup, Demokraatit aamma Nunatta Qitornaasa erseqqilluinnartumik isummernissaat.

Inuit Ataqatigiit isummerpugut nunatsinni utoqqaat utoqqalinersiaasa qaffannissaat akuerissallutigu. Inuit Ataqatigiit isummerpugut utoqqalinersiaqalernissamat ukiut aallartiffiusussat 66-inut inissinneqarnissaat akuerallutigu. Aamma Inuit Ataqatigiit tunuarsimaanngilagut inuiaqatigiinni arnat angutillu inuuneqqortussusiannut agguaqatigiisitsinermik tunngaveqartumik aalajangiissagutta. Taamaalilluni utoqqalinersiaqalernissamat ukiut aallartiffiusussat 65-nut siuartinneqarnissaat pillugu isummersoqataanissarput ammaffigaarput. Ammaffigaarputtaaq ukiuni aggersuni utoqqalinersiaqalernissamat ukioqqortussutsimik killiliinerup ukiuni aggersuni qaffakkiartuaarunnaarsillugu aalajangeeqataanissatsinnut.

Utoqqartatta utoqqalinersiaasaat aningaasartuutiginaveersaaginnarlugit nunatsinni inuit inuuneqqortussusaat malillugit naalakkersuisooqatigiit kinguarsaarsaaginnarnerat Inuit Ataqatigiinniit isumaqatiginngilarput. Inuk utoqqalisooq aningaasamik "oqimaalutarneqarsinnaanngilaq". Inuiaqatigiittut utoqqartatsinnut pitsaasumik atugassaqartitsinissarput pisussaaffigaarput. Periarfissatut isiginagu pisussaaffittut isigisariaqarparput. Anersaaq taamaattoq maanna naalakkersuisooqatigiit atuuttut sulineqatiginneranni maqaasivarput. Siunnersuutilli maanna sammisavut periarfissiipput utoqqalinersianik qaffaanissamat, ukioqqortussutsimillu piumasaqaammik appaanissatsinnut ataatsimoorussaqaarnissatsinnut.

Maani inersuarmi qinikkatut sulisuusugut tamatta nalunngilarput nunatsinni innuttaasut ulluinnarni inuuniarnikkut atugaat naligiinngilluinnartumik inissisimalersimasut. Naligiinnginneq sulisartukkormiut akissaasersorneqarnerisa appasippallaarujussuarnerisigut takussutis-saqalereerpoq. Inuit isertitakinnerpaat utoqqalisussat amerlapput, utoqqaligunik katersaat inuunerissaarnissamut naammangerujussuassasut takuneqarsinnaalereerpoq.

Massakkut allannguinnikkutta taava kikkut akisussaaffik tigussavaat? Allannguisoqassappat massakkut Inatsisartut allannguisariaqarpugut. Massakkut aalajangiisinnaassuseqarpugut. Suleqatigiilluta paaseqatigiilluta utoqqalinersiat qaffatsigit. Ikioqatigiilluta utoqqalinersiaqalernissamut ukiut aallartiffiusussat qaffakkaluttuinnartinniakkasi appartigit. Paaseqatigiillaqqinnerulluta sulinissatsinnik kaammattuutisi tusaavagut atorluarusunnaqaaq. Inuit Ataqtatigiit utoqqartatta atugarisaasa aqqinnissat pisariaqarlunnartutut isigaarput. Siunissami piimaartussatut isigalugu qinigaajumaartussanut allanut akisussaaffik "miloriutinngilarput". Utoqqartavut massakkut pisariaqartitsimmata massakkut aqqiisoqarnissaa suliariumavarput. Ammaffigaarput Inatsisartut Aningaasanut inatsisaanni maanna isumaqatiginninniutigineqartumik ukiuni tulluittuni utoqqalinersiaqalertussat ukioqqortusineqarnissaannik naalakkersuisooqatigiit kissaataat atorunnaarsillugu piimasaqaat ukiunut 65-inut imaluunniit 66-inut apparneqassappat.

Aamma ammaffigaarput nunatsinni utoqqartavut pineqartillugit Inatsisartunut ilaasortat isumaqatigiilluinnarsimappata, partiinillu tamanit isumaqatigiittoqarpat immikkut ittumik inatsisartut suleriaasiat naapertorlugu inatsisiliortoqassasoq. Utoqqalinersiassat qaffanneqarnissat angujumagutsigu inatsisissaq ingerlaannartumik siullermeerlugu aappassaaneerlugu pingajussaaneerlugulu naammassineqarnissaa suleqataaffigissallutigu. Utoqqalinersiassat pineqartillugit ukiorpanni aqqiiniaasaartoqarnera naammaleqaaq. Allanguinissat kinguarsarnagit maanna Inatsisartut isumaqatigeeriarlutik aqqeeqatigiissinnaanerit periarfissaavoq. Inatsisartut aalajangiinerat malillugu Naalakkersuisut pikkorikkunik ajornartorsiutitaqanngitsumik aqqeeqataanissat periarfissaalluarpoq.

Utoqqalinersiassat qaffanneqarniarlik. Utoqqalinersiaqalernissamut ukiut aallartiffiusussat siuartinneqarniarlik. Inatsisartut isumaqatigiilluinnarsimassagutta massakkut aqqiinissaq sukkasuumik suliarineqarniarli. Inuit Ataqtatigiit siunnersuuteqartut tamaasa taperserlugit Inatsisartut Aningaasaqarnermut Akileraartarnermullu Ataatsimiititaliaani suliarineqartussanngorlugit ingerlatinneqarnissat inassutigaarput. Neriulluta siunnersuutit tamanit isumaqatigineqarlutik aamma sukkasuumik sulisinnaanerput tamanit isumaqatigineqassasoq.